



A rivin. A rivin! Cu la biele stagjon a rivin...

Mi invadin la vecje cjase ma jo no pues fâ nie. O ai di tignîmai. O vevi simpri pensât che a fossin dai ragns ma dopo, cu la lint di ingrandiment, o ai viodût che a jerin come dai piçui scarabeus; sglonfs, di colôr moron che al tire tal bordò e lis gjambutis zalis. Gno nevôt Max, grant babio, al sgarbone spes tal interdèt e mi à dit: “Nonno. È il *Gibbium psylloides*; un piccolo coleottero originario dell’Asia e importato da molti anni con le balle di cotone... il sito dice che è innocuo e si nutre di resti vegetali... lo si trova tra i cuoiami, gli erbarî...”

Strani. Chei sapientons di Italiauno a vevin fevelât di “pulci” che si cjatavin a miârs intun magazen bandonât di stofis a Milan: ûstu viodi che a jerin propit chês besteutis alì, i gibbii? Lu scrîf par talian, parcè che ancje tal plui grant vocabolari furlan no tu cjatis il non di cheste besteute che e vîf tes nestris cjasis. E je tant comun che il gno amion Remo si jere cussì spaurît che al à clamât a disinfestâ. I àn domandât 500 euros e al à scugnût lâ a durmî trê gnots a cjase di sô gnece! E jere une peste boboniche! Tornât te sô dimore si è nacuart che a ‘nd jerin ancjemò!

Baste tignî net mi à dit Nirvana, la zovine che e ven a fâ voris. Di cuant che e je jê a son diminuîts e cence butâ nissun velen! Clamait une brave femine a netâ e no stêt fâ come Remo!

Par chel che al rivuarde il non dal “gibbio” par furlan gno nevôt al propon “coleotar sferic”. Ce pensino ducj i savints e i spudesentencis che a disin simpri la ultime su la lenghe furlane?

Mi plasarès savêlu...

di Milio dai cjans